

**Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaattut siunnersuummut nassuiaatit**

**I. Ataatsimmut nassuiaatit.**

Inatsit una uumasunik illersuineq qimmiuteqarnerlu il.il. pillugit akisussaaffimmik Namminersornerullutik Oqartussat tiguseranni malittarisassiarineqartut ilagaat. Inatsisikkut tassuuna siunertarineqarpoq Kalaallit Nunaata qimminik qimuttunik peqqissunik peqarnissaata tunngavissinneqarnissaa, kiisalu qimmit qitsuillu eqqortumik pineqarnissaat qularnaarniarneqarpoq. Aamma uumasut inuiaqatigiillu pitsaasumik inooqatigiinnissaat pillugu arlalinnik aalajangersagaqarpoq. Erseqqissumik oqaatigalugu, inatsisissatut siunnersuummi innuttaasut isumannaatsuunissaat peqqissusiallu pillugit aalajangersagaqarpoq, tassa tamakku nersutit nappaataat inunnut tunillaassorsinnaasut pillugit inatsisini ilanngunneqarsimatinnagit.

Inatsisissatut siunnersuummi naatsorsuutigineqarpoq Kalaallit Nunaanni kissaatigineqartoq kalaallit qimmiat qimuttoq allanik akuneqassanngitsoq qimminit allanik nagguilinnit timip sananeqaataanik akusaanani.

Uumasut peqqissuunissaannut tunngasut Nunalerinermut Aalisarnermullu Ministeriaqarfimmit akisussaaffigineqarput. Uumasut peqqissuunissaannut tunngasut taamalillutik *nersutaatit nappaataat pillugit Inatsit nr. 814 21. december 1988-imeersumi* ilaapput, Kalaallit Nunaannut atuuttussanngortinneqartumi *kunngip peqqussutaatigut 18. december 1991-imeersukkut.*

Nersutit nappaataannut inunnut tunillaassorsinnaasunut akiuunneq Kalaallit Nunaannit akisussaaffigineqarpoq, *inuussutissanik nersutillu nappaataannik inunnut tunillaassorsinnaasunik nakkutilliineq pillugu Inatsisartut peqqussutaannut nr. 1-imut 28. oktober 1993-imeersumullu* ilaalluni.

Uumasuutit peqqissutsimikkut qanoq issusii pillugit inatsimmi uani aalajangersakkat qanoq issutsit aalajangersakkani siuliinit taaneqartunit pineqanngitsut pineqarput, soorlu naalliutit kingornussanik pissuteqartut kiisalu uumasuaqqanit pissuteqartut.

Inatsisissatut siunnersuutip suliarineqarnerani pinaveersaartitsineq pingaartinneqarpoq.

Inatsisissatut siunnersuut aningaasartuutitigut sunniuteqassangatinneqanngilaq.

## **II. Aalajangersakkanut ataasiakkaanut nassuiaatit.**

### *§ 1 pillugu.*

Aalajangersakkat inatsisikkut siunertarineqartunut nassuiaatini nalinginnaasuni taaneqartunut erseqqissaataapput.

### *§ 2 pillugu.*

Aalajangersakkakkut erseqqissarneqarpoq inatsit qimminut qimuttuinnarnut atuutinngitsoq, kisiannili Kalaallit Nunaanni qimmit tamarmik pineqartut; tassa savaatillit qimmii, qimmit innarluutillit ikiortaas, qimmit aliikkutassiat, qimmit sulisittakkat. Qitsuit aamma killilimmik inatsimmi pineqarput.

### *§ 3-mi imm. 1 pillugu.*

Inatsisissatut siunnersuummi qangaaniilli qimminik qimuttoqarfiusut allanngortinneqannginnissaat siunniunneqarpoq. Inatsisip oqaasertaani oqaatsit atorneqartut taamaallaat oqaatsit manna tikillugu atugaasut nutarterneqarnerisut isigineqassapput. Oqaatigineqassaarli maanna Kangerlussuaq qimminik qimuttoqarfiusutut ilanngunneqarmat periaatsit atuutereersut malillugit.

### *§ 3-mi imm. 2 pillugu.*

Aalajangersakkakkut qimuttoqarfiusut killingisa allanngortinnissaannut Naalackersuisut periarfissinneqarput. Aallaaniartilluni kommuni sanilerisamut qimussertariaqalernermit tunngatillugu tamanna naleqquttuusinnaavoq.

### *§ 4-mi imm. 2 pillugu.*

Aalajangersakkakkut Naalackersuisut pingaartumik nakkutilliinissamik pisinnaatitaaffimminnik kommunalbestyrelsinut tunniussinissaminnik periarfissinneqarput.

### *§ 5 pillugu*

§-inut, 7, 9, 10, § 13-imi imm. 1 aamma §-it 15, 16, aamma 19-imut tunngasutigut kommunalbestyrelsit nakkutilliisutut oqartussaapput. Qimmiuteqarneq pillugu aalajangersakkat maanna atuuttut naaperlugit kommunalbestyrelsit ullumikkut suliarisartagaannut taakku naapertuupput.

## *§ 6 pillugu*

Oqartussaasut attuumassuteqartut pisinnaatitaaffii aalajangiunniarlugit kiisalu eqqartuussiviit aqqutigeqqaarnagit nakkutilliisoqarsinnaaqullugu aalajangersagaq ilanngunneqarpoq.

## *§ 7-imi imm. 2*

Sumiiffiit uumasut avatangiisilluuniit eqqarsaatigalugit qimmeqarfiusussatut naleqqutinngitsut ajornartorsiorfiusussaasuniluuniit, soorlu atuarfiit meeqgeriviillu eqqaanni qimmiliviit, sanaartorfinni qimmit paarsisut imaluuniit mittarfinni eqqaanilu qimmiliviit allaffissornikkut aalajangersaavigineqarnissaannut Naalackersuisut periarfissaqarnissaata qularnaarneqarnissaa aalajangersakkakut siunertarineqarpoq.

## *§ 8 pillugu*

Uumasuusivinniititsineq eqqiluisaarnikkut uumasullu sernissorneqarnissaatigut ajornartorsiutitaqarsinnaasarpoq. Taamaammat tamakku ajornartorsiutaasinnaaneri pisuni ataasiakkaani naliliivigeqqissaarneqartariaqarput. Taamaammat aalajangersakkakut tassuuna siunertarineqarpoq Naalackersuisunit suliamik ilisimasalinnik naliliisoqarteqqarlugu taamaattunik uumasuusiliviliortoqartassasoq ingerlatsisoqartassasorlu, aamma siunertarineqarpoq ajornartorsiutit taaneqartut pinngitsoortinniarlugit uumasuusiviit malittarisassiorneqarsinnaassasut.

## *§ 9-mi imm. 1 pillugu*

Qimmit pitussimanatik angalaaginnartut innuttaasut isumannaatsuunissaannut ulorianartorsiortitsipput, aammalu eqqiluisaarnissaq eqqarsaatigalugu kissaatigineqaratik. *Qimmit qimuttut pillugit Landsrådet ileqqoreqqusaanni 22. juni 1957-imeersumi* piumasaqaataavoq qimmit arnavissat nulusut, qimmit angalaaginnartut qimmillu kiisortut pitussimaneqassasut, taamatullu qimmit pitussimanngitsut ajoqusigaannut akisussaasuutitassaaneq pillugu immikkut maleruagassaqarluni. Taamaakkaluortoq qimmit pitussimasannginnerat nalinginnaasutut isigineqartarpoq, taamaammallu qajaq minnerpaamik 2 meterinik qutsitsigisumiinngippat kimmarlugu aserorterneqarneranut taarsiisoqarsinnaanani.

Aalajangersakkat nutaat qimmit pitussimasussaataitanerat pillugu kommunini qimmeqarneq pillugu ileqqoreqqusani aalajangersakkanik atuutereersunik inatsisitigut atuuttussanngortitsinertut isigineqassapput.

Manna tikillugu maleruagassat taakku sanioqqunneqarsinnaasimapput, tassa qimmit arnavissat piarallit sumiluunniit angalaarsinnaatitaammata. Aalajangersagaq taanna atuutilersinneqarsimavoq qimmit arnavissat piarallit nammineerlutik eqqaminni

nerisassarsiorsinnaanissaat siunertaralugu. Taamaattorli qimmit nuliusut pitutaanngitsut eqqaminniittunut navianartorsiorititsisarput, qimmimmi taakku soorunami piaqqaminnik takornartanut illersuiniartarmata, qassiinillu takussutissaqarpoq qimmit arnavissat pitutaanngitsut kiisillutik annertuumik ajoqusiinerannik. Kisiannili pissusissamisuussaaq piumasaaqatigissallugu qimmimik piginnittup qimmit arnavissat tamakku ungaluukkat iluanniitissappagit pitussimassallugilluunniit, pisariaqartinneqartumillu nerukkartassallugit.

*§ 9-mi imm. 2 pillugu*

§ 9, imm. 1-imi aalajangersakkami qimmit aliikkutat aamma pineqarmata maluginiarneqassaaq. Taammaattorli aalajangersagaq qimminut naalakkersukkanut savallu qimmiinut atuutinngilaq, taamaattoqaraluarpammi sulisinnaanaviangillat, aamma aallaaniarnermut allanullu illoqarfiup sanaartorfiusimasup avataani qimminik atuinissaq periarfissinneqarpoq.

*§ 9-mi imm. 3 pillugu*

Aalajangersakkakut erseqqissarneqarpoq oqartussaasut taarsiissuteqarnissamut akisussaaffiligaanatik qimminik pitussimanngitsunik sumiiffimmi malittarisassaqartitsinikkut aqutsinnaatitaanerat. Soorunalimi qimmit unioqqutitsinerunngitsunik pitussimanngitsut toqunneqassanngillat.

*§ 10 pillugu*

Qimminik kiisortunik pigisaqarnissamut inerteqqummik siusinnerusukkat atuuttumik aalajangersagaq ingerlatitseqqinneruvoq, kommunalbestyrelsillu qimmit kiisortut toqunneqarnissaannik akisussaaffilerneqarlutillu pisussaaffilerneqarlutik. Kalaallit qimmiat qimuttoq ileqqoralugu naggueqatigiittut kamajasuujunngilaq kiisortuunaniluunniit. Qimmillu ulorianartortaqaraangata perorsarnerlugaaneri pisariaqanngitsumilluunniit pillarneqartarneri pissutaagajuttarput.

*§ 10-imi imm. 2. pillugu*

Qimminik kiisortunik piginnittoq nammineq piomassutsiminik qimmimi toqunneqarnissaanut akuersisoq malittarisassat atuuttut naapertorlugit taarsiiffigineqarsinnaavoq. Periarfissaq taanna inatsisissatut siunnersuummi matumani ilanngunneqanngilaq.

*§ 10-imi imm. 3 pillugu*

Inuit kiineqarlutik annertuumik ajoquserneqarnissaat pinngitsoorniarlugu ukiuni arlalinngortuni *Qimmit qimuttut pillugit Landsrådip ileqqoreqqussaa 22. juni 1957-*

*imeersoq, Landsrådip ileqqoreqqusaatigut 4. marts 1959-imeersukkut,* allangortinneqartumi §-it 6 aamma 7 naapertorlugit qimmit qimuttut tuloriaasa kipineqartarnissaat piumasarineqartarpoq. Inatsisip matuma akuersissutigineqarneratigut malittarisassat taakku atorunnaarsinneqassapput paragrafilli taakku marluk atuutsiinnarneqassallutik kigutaajaasarneq pillugu Naalackersuisut nutaanik malittarisassiornissaasa tungaanut. Tuloriaajaariaaseq ullumi atorneqartoq qimmit kigutimikkut alleqqumikkullu aseruuttoornerannik kinguneqarajuppoq, taamaammallu uumasut illersorneqarnissaannit isigalugu eqqarsarnartoqarluni. Taamaammat nutaanik malittarisassiortoqartinnagu periutsit allat atorneqarsinnaanersut misissorneqartariaqarpoq.

#### *§ 11-imi imm. 1 pillugu*

Qimmiuteqarnermut tunngatillug akisussaaffiup erseqqissarneqarneratut aalajangersagaq isigineqartariaqarpoq. Tamatuma kingunerisaanik qimmiutillit akisussaannermut sillimmasernissaat inatsisitigut piumasarineqarluarsinnaavoq, tamannalu kommunit qimmeqarneq pillugu ileqqoreqqusaatigut periarfissaqalerpoq. Qitsuit aalajangersakkami pineqanngillat, qitsuimmi annertuumik ajoqusiinissaat naatsorsuutigineqanngimmat.

#### *§ 12 pillugu*

Innuttaasut avatangiisillu qimminit ulorianartunit - soorlu pitbull terriersinit, aqutsineq aqutugalugu illersuinissaminnut Naalackersuisut periarfissaqaqqullugit aalajangersagaq ilanngunneqarpoq. Qimmit issittumi umasinnaanngitsutut naatsorsuunneqartariaqartut, soorlu kineserit qimmii meqqoqanngitsut qimmilluuniit pilattaanerinnakkut piaqqisinnaasut taamaammallu nunatta pissusia pissutigalugu ernisussiorasuarneqarsinnaanngitsut, aqutsinikkut inerteqqutigineqarnissaannut aalajangersagaq taanna aamma atorneqarsinnaavoq.

#### *§ 13 pillugu*

Qimmit pillugit ileqqoreqqusat maannakkut atuutut suliarineqarsimapput *Kalaallit Nunaanni qimmit qimuttut aamma qimmit nappaataasa akiorneqartarnerat pillugit aalajangersakkat Nalunaarutit 1936*, maanna atorunnaarsilersarneqartut tunngavigalugit. Taamaammat inatsimmi uani aalajangersagaq ilanngunneqarpoq kommunit qimmit qitsuillu pillugit ileqqoreqqusaliarisarumaagaat inatsisinik tunngavissaqaqqullugit.

Inatsimmi piumasagaatit minnerpaaffissaannik qimmit qitsuillu pillugit kommunit ileqqoreqqussaasa malinninnissaat qularnaarniarlugu inatsit akuersissutigineqarniartorlu tamanna pillugu nalunaarummik atulersitsisoqarnissaa pilersaarutigineqarpoq. Nalunaarutikkut kommunalbestyrelsit nammineerlutik aalajangiinissaminnut sulii periarfissaqassapput.

Nalunaarut kommunit qimmeqarfiusut ileqqoreqqusaliaasa imarisassaas pillugit aalajangersakkanik imaqassaaq, ilaatigullu kommunini qimmeqarfiunngitsuni kommunit ileqqoreqqusaliornert pillugu imaqassalluni.

*§ 14 pillugu*

Uumasut ileqqussat malillugit, illersorneqarnissaallu eqqarsaatigalugit, paarilluarneqarnissaat qularnaarniarlugu, ilaatigullu qimmit peqqissooqqullugit sullerisooqqullugillu aalajangersagaq ilanngunneqarpoq. Nunani killerni allani aalajangersakkat assingusut naapertorlugit aalajangersagaq ilusilerneqarpoq.

*§ 15 pillugu*

Aalajangersagaq taanna § 14-imut tapertaliussatut isigineqassaaq, oqaatsillu *periaatsit akuerisaasut aamma ilisimatuussutsikkut misilittakkat* maluginiarneqassapput, taakkunuuna Kalaallit Nunaanni ukiuni untritilikkaani qimmeqarnermik misilittakkat qimmit eqqortumik paarineqarnissaanik naliliinermi ilanngunneqarnissaat qularnaarniarneqarpoq.

*§ 15-imi imm. 2*

Aalajangersagaq taanna pingaartumik qimmit qimuttut isumagineqarnerat eqqarsaatigalugu ilanngunneqarpoq. Naluneqanngilaq qimmit inissisimaffii imermik qarsunneqarsimasut upernaat tamaasa takuneqartartut.

*§ 15-imi imm. 3 pillugu*

Qimmit nakkutigilluarneqarnissaat qularnaarniarlugu aalajangersagaq ilanngunneqarpoq. Kalunnerit ilarusimasut, qimmit pitoqqanngitsut, ajoqusersimasut il.il. qimmeqartut akuttunngitsumik ajornartorsiutigisaraat ilisimaneqarluarpoq. Ajornartorsiutit tamakku qimmiminnik paarsilluartunit paasiaarneqartariaqarput iluarsipallanneqartariaqarlutillu.

*§ 15-imi imm. 4 pillugu*

Mattusimajuaannarlugit qitsuuteqartoqartartoq ilisimaneqarpoq. Tamanna uumasunik paarsinerlunnertut isigineqartariaqarpoq, aalajangersakkakkullu tamannarpiaq pinaveersaartinniarneqarpoq.

*§ 15-imi imm. 5 pillugu*

Ukiukinnerusut nersutaateqarnissaat aalajangersakkakut inerteqqutigineqanngilaq, inersimasulli meeqqamut attuumassuteqartut meeqqap uumasuteqarneranut akisussaatinneqarlutik.

*§ 16-imi imm. 1 pillugu*

Kommunit ilaanni qimmeqarneq pillugu ileqqoreqqusani aalajangersagaqarpoq qimmit "qasusut" qimusserluni angalanerni il.il. qimanneqaqqusaanngitsut, kisiannili ingerlaannartumik toqunneqartussaallutik. Iimagisariaqarpoq maleruagassaq taanna atuutilersinneqarsimasoq taamatut pisoqartarneranik misilittakkat tunngavigalugit. Aalajangersagaq naleqquttutut isumaqarfigineqartoq Kalaallit Nunaannut tamarmut atuuttussatut ilanngunneqassasoq siunnersuutigineqarpoq. Aamma ilisimaneqarluarpoq qimussinik sukkaniunnermi qimmerpassuit pituerneqartartut illinernullu qimanneqarlutik. Qimmit tamakku ilarpaalui angalaaginnassapput, allallu ajoqusersimanitik il.il. pissutigalugit imminnut paarisinnaanaviarnatik. Qimusserluni sukkaniunneq pillugu nunat tamalaat malittarisassaasigut qimmit aqqutini qimanneqarnissaat inerteqqutigineqarpoq, annermik uumasut illersorneqarnissaat pissutigalugu. Taamaammat malittarisassap taamaattup atulersinneqarneratigit Kalaallit Nunaanni qimussimik sukkaniunnerni malittarisassat nunat tamalaat tamatumunnga malittarisassaannut naapertuutilersinneqassapput, soorluttaaq sukkaniuttoqareersorlu qimmit kissaatigineqanngitsumik angalaaginnartarnerat unitsinneqassasoq.

*§ 16-imi imm. 2 pillugu*

Assersuutissarpassuaqarpoq ineqartut inigisaminnik qimatsisarmata nersutaatitillu qimaannartarlugit taakku isumannaatsumik paarineqarnissaat isumannaqqaarnagu. Tamanna paarsinerlunnertut isigineqartariaqarpoq aalajangersakkamilu taamatut periaaseqartoqartarnissaa inerteqqutigineqarluni.

*§ 17 pillugu*

Pissusissamisuginnartussaavoq nersutaatinik toqutsineq sukkasuumik naakkittartumillu pisassappat. Kisiannili qimminik qimitsilluni toqutsineq qimmeqarfiit ilaanni ileqqutoqaavoq. Qimitsisarneq isiginnaartuusinnaasunut amilaarnarpoq inuppalaanngitsuliornertullu isigineqartariaqarluni. Taamaammat qimmit qitsuillu ipititsinikkut, qimitsinikkut nivinngaannikkulluuniit toqunneqarnissaat aalajangersakkakut inerteqqutigineqarpoq.

*§ 18-imi imm. 1 - 3 pillugit*

Aalajangersagaq taanna *inuit nersutit nakorsaattut ilinniarsimannngitsut nersutit nakorsaattut suliaqartitaasarnerat pillugu Veterinerdirektoratip nalunaarutaanut nr. 331-mut 24. maj 1995-imeersumut* nersutit illersorneqarnissaannut tunngatillugu

ilassutitut paasineqassaaq. Aamma tassuuna isikkorinnerulersitsiniarluni pilattaasarnerit inerteqqutigineqarput, tassa ilaatigut ileqqorissaarnissamit isigalugu, ilaatigullu erseqqissarniarlugu uumasut sulisorineqarnissaat pillugit Kalaallit Nunaanni pigineqartarmata isikkorissusissaat pinnagit. Aalajangersagaq pamiuersisarnermut siutaarsisarnermullu tunngasunik aamma imaqqarpoq.

Kiisalu qimmiutillit ilaasa qimminut napparsimasunut suli atortagaat, qimminik pamiusa/siu-taasa nuui ilanngarlugit taqarsiuisarneq inerteqqutigineqarpoq. Inerteqqutikkut qimmit naalliutinneqannginnissaat soorunami qularnaarniarneqarpoq, annnermilli qimmit napparsimasut suli nukillaarnerunissaat pinngitsoorniarneqarluni.

*§ 18-imi imm. 4 pillugu*

Qimmeqarfiit ilaanni pisarnertut qimmit pituminnik killueqqunagit nivinningsiarsinnarlugit kaattamik assigisaanilluuniit erlippaasa suliarineqartarneri aalajangersakkami tassani inerteqqutigineqarput. Taamaaliortarneq inuppalaannginnertut pisariaqanngitsutullu isigineqartariaqarpoq.

*§ 18-imi imm. 5 pillugu*

Qitsuit ilaasa kukigissartarnertik ileqqoriinnarpaat. Tamanna pissutigalugu qitsuutillit ilaasa qitsuutitik pilattarlugit kukiartittarpaat, tamannalu qitsuup ileqqanut akuliunnertut naammaginangitsutut isigineqartariaqarpoq. Danmarkimi misilittakkat aallaavigalugit aalajangersagaq ilanngunneqarpoq, tappavani taamaattumik aalajangersaasoqartariaqarsimammat.

*§ 19-imi imm. 1 - 4 pillugit*

Aalajangersakkatigut kalaallit qimmiata qimuttup naggueqatigiittut illersorneqarnissaa taassumalu immikkut piginnaassusiisa ukiuni untritilinni ineriartortinneqarsimanerisut pigiinnarneqarnissaat siunertarineqarpoq. Kalaallit qimmii qimmit nappataannut avataaneersunut qimminillu allanit kissaatigineqanngitsumik akuneqarnissaminnut aalajangersakkakkut illersorneqassapput. Taamaammat imm. 3-imi immikkut pinninnerit Naalackersuisunut nakkutigisassanngortinneqartut eqqaassanngikkaanni qimuttut qimmillu allat avissaarsimatilluinnarneqarnerat allanngortinneqassanngilaq.

*§ 19-imi imm. 5 pillugu*

Kalaallit qimmii qimmeqarfinnit nuutat, taakkuninnga akusat, qimuttulluuniit nunanit allaneersut qimuttoqarfiunngitsuni eqiterneqarnissaat pinngitsoorniarneqarpoq.



### *§ 20 pillugu*

Anisuunik mannessanillu avataanit namminersorluni eqqussuinerup kingunerisaanik kalaallit qimmii qimuttut kissaatigineqanngitsumik akuneqarsinnaapput. Illuatungaatigulli anisuumik mannessanilluuniit nuussisarneq qimmeqarfinit assigiinngitsunit pilersaarusiukkamik kinguaassioortitsiniarnermut atorneqarsinnaavoq taamalu qimmit akuneqanngilersut akuneqaatigisinnaallugu. Taamaammat taamatut kinguaassioortitsisarnerup inerteqqutigilluinnarneqarnissaa siunertarineqanngilaq, qularnaarniarneqarlunili taamaaliornerup kissaatiginassusianik Naalakkersuisut pisuni ataasiakkaani naliliisarnissaat kiisalu tamanna pillugu erseqqinnerusumik malittarisassiorsinnaanissaat pisariaqarpalluuniit inerteqquteqarsinnaanissaat.

### *§ 21 pillugu*

Perlerornerup nappaatilluuniit allat nappaatit tunillaassortut pillugit inatsimmi pineqartut nakkutigineqarnissaat aalajangersakkakut siunertarineqanngilaq. Qimmit qitsuillu peqqissusiannut tunngasunik allanik, soorlu uumasuaqarnerinik kingornussaminnilluuniit nappaateqarnerinik misissuiffigineqarnerinik nakkutilliinissamut aalajangersakkap atorneqarnissaa eqqarsaatigineqarpoq. Nappaatit tunillaassortut uumasullu nappaataasa akiorneqarneri pillugit aalajangersakkanisulli peqqinnissamut tunngasunik iliuuseqartoqarnerani uumasunik piginnittup pisariaqarnera naapertorlugu ikiuunnissaanik aalajangersakkakut pisussaaffiliineqarpoq.

### *§ 22 pillugu*

Qimmeerniarneq qitsuerniarnerlu pillugit aqutsinikkut malittarisassioortoqarnissaanut aalajangersagaq periarfissiivoq. Aalajangersagaq taanna naapertorlugu malittarisassiorneq uumasut allanit akuneqarnissaat akuneqannginnissaalluuniit, imaluuniit illersorneqarnissaat eqqarsaatigalugit pisinnaavoq.

### *§ 23 pillugu*

Qimmit qitsuillu angallanneqarneri, aamma uppernarsaatitaqartinneqarnissaat, pillugit malittarisassiornissamut aalajangersagaq periarfissiivoq. Aalajangersagaq taanna naapertorlugu malittarisassiorneq uumasut akuneqatsaaliornissaat akuneqarnissaalluuniit imaluuniit illersorneqarnissaat aallaavigalugit annermik pisassasutut naatsorsuutigineqarpoq.

### *§ 24 pillugu*

Qimmit qitsuillu pitsaanngitsumik pineqarneri pillugit nakkutilliinermi suleriaasissat aalajangersakkakut aalajangiunneqarput, aamma qularnaarneqarpoq pisut ataasiakkaat tamarmik uumasut nakorsaanit isummerfigineqartassasut.

*§-it 25-imiit 27-imut pillugit*

Aalajangersakkat taakku danskit tamakku pillugit inatsisaannut naapertuupput, aamma taakkunuuna qimmit qitsuillu eqqunngitsumik pineqarnerini politimesterip pilertortumik akuliussinnaanera periarfissinneqarpoq.

*§ 28-imi imm. 3-imiit 5-imut*

Kalaallit Nunaanni uumasuuteqarnermut tunngatillugu aalajangersakkat nutaajupput, taakkunuunami eqqartuussiviit aqutugalugit inuit piffissami aalajangersimasumi imaluuniit kingornamut qimmeqarsinnaajunnaarlugit qitsuuteqarsinnaajunnaarlugillu, allatulluuniit tamakkuninnga suliaqarsinnaajunnaarlugit eqqartuunneqarnissaannut periarfissiisoqarpoq. Erseqqissarneqassaaq taama eqqartuussineq aatsaat pisinnaammat inatsimmi uani paragrafinik taaneqartunik, imaluuniit kommunit qimmeqarneq qitsuillu pillugit ileqqoreqqusaannik annertuumik unioqqutitsisoqarpat unioqqutitsisoqaattaarpalluuniit.